

L lunare 2016 dei iagri

Le ilustrazion curade endavò da Giulio Tasca

Cultura - Davò avei depént chél del 2014, l artist vicentin ma remplanté nte la Val de Flem Giulio Tasca l é sté clamé endavò per accompagné con suoi depén realisc l lunare 2016 del Distret dei iagri del Agordin. Tasca l é nasciù a Bassano del Grappa ntel 1973 nten ambient che ava sou da ciacia: l nono l eva guardiaciacia, l pere ciaciadou e cesa sua l'eva da spëss teater dei "filò" de ciacia, ulache ruáva adalerch da spëss i amisc del pere a descore de chél capriol, de chél trofeo o de coche l'eva juda la

stagion de ciacia. Nte sto ambient, fat de storie e de anedoti, l fantasticheia e l é dël nstéss a sburlé suo pere a jì a ciacia per vedei i animei nte suo ambient. I prums desens l scomencia a i fe cánchez l a diesc agn per po' jì n navánt senza se fermé cuaji come n debujen ogni outa che i é rua nte la mán n lapisc o n penel. Cánchez l rua a avei i agn l se fesc la licenza de ciacia e duc i corsci per la selezion. Chést i é mpermët de vedei e studié ncora meio i animei nte suo ambient. Grazie al pere, che l va a ciacia nte

"LA USC DI LADINS"
GENN. 2016

deplù riserve, l ciafieia a cugnësce le realtà de Sudtirol, e de la Slovenia, da ulache l tol ite ispirazion che l tradusc nte suoi desens. Da autoditat l scomencia coscita n studio su le tecniche che mira a cherì l particolar, che se tradusc nte troppe mostre fate ntel trentin e nte la "sua" provinzia. La vëna atistica per n toch la se ferma e cuaji la va a morì via a gauja de problemi personali e de fameia, che l porta a jì tres plu dalonc dai animei. Passada la criji, l autor l tourna a ciapé la pesc daite de dël,

che l tradusc n èrt. Davò agn de rizerche e prove de tecniche e materiali, che metus auna fesc de sua pitura n'espreszion de iperrealism. Suoi quadri defati, i se fesc cugnësce per i colour sobri e naturai che l doura, ombrie e lum che nsomeia cuaji vis. Suo studié l lo porta a douré i colour acrilizi deleghei a iega e autre miscele che l sperimenteia su tèle de faesite tradata e planada. Per vedei soui laour se po vijité suo scito www.giuliotasca.it o nte suo atelier a cesa sua a Stava (TN). (ls)



Una de le ilustrazion de Giulio Tasca sul lunare dei iagri.